

DOMENIE V «VIE PAL AN»

Antifone di jentrade Sal 94,6-7

Vignît, adorîn Diu,
butînsi a schene plete denant dal Signôr che nus à creâts;
al è lui il Signôr nestri Diu.

Colete

Ten cont di cheste tô famee, Signôr,
cuntun afiet che nol cognòs polse,
e, midiant che si poe dome inte sperance de gracie dal cîl,
vuardile simpri cu la tô protezion.
Pal nestri Signôr Gjesù Crist to Fi, ch' al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Jp 7,1-4.6-7

Gnots di tribulazion mi son stadis dadis.

Dal libri di Jop
Jop al cjapà la peraule e al disè:
«L'om no frontial forsît une lote dure su la tiere
e i siei dîs no sono come chei di un mercenari?
Come il sclâf ch'al suspire l'ombrene
e come il mercenari ch'al spiete la sô pae,
cussì o ai vût dal distin mêsi di inlusion
e gnots di tribulazion mi son stadis dadis.
Se mi distiri, o pensi: «Cuant podaraiò jevâ?»,
ma la gnot no finès plui
e o soi sfracaiât des pôris fint a l'albe.
I miei dîs a an corût plui svelts di une spolette
e si son consumâts cence sperance.
Visiti che la mê vite no je plui che une soflade,
e i miei vôi no viodaran mai plui il ben.
Peraule di Diu.

SALM RESPONSORIÂL dal Salm 146

R. Vuarissinus, Signôr, Diu de vite.

O ben:

R. Aleluia, aleluia, aleluia.

Al è biel cjantâi al nestri Diu;
al è propit dolç dâi sù la laude.
Il Signôr al torne a fâ sù Gjerusalem,
al tire dongje i fîs di Israel sparniçâts su la tiere. **R.**

Chei ch'a an il cûr crevât lui ju risane
e al medee dutis lis lôr feridis.
Lui al conte il numar des stelis,
par non une par une lis clame. **R.**

Grant al è il nestri Diu
e cence confin la sô potence.
Il Signôr al ten sù i piçui,

ma i triscj ju sdrume fin par tiere. **R.**

SECONDE LETURE 1 Cor 9,16-19.22-23

Puar mai me se no predicjâs il vanzeli!

De prime letare di san Pauli apuestul ai Corints

Fradis, par me predicjâ il vanzeli no je une braure; o sint une dibisugne, e puar mai me se no predicjâs il vanzeli! Se lu fasès di mê volontât, o varès la pae; ma no fasintlu di mê volontât, al vûl dî che mi è stade dade une consegne. Cuâl saraial alore il gno merit? Chel di predicjâ il vanzeli cence fâ valê il dirit che il vanzeli mi da.

Di fat, seben ch'ò soi libar denant di ducj, mi soi fat servidôr di ducj par vuadagnâ plui int ch'ò podevi. Mi soi fat debul cui debui, par vuadagnâ i debui; mi soi fat dut a ducj, par salvâ in ducj i mûts cualchidun. E o fâs dut pal vanzeli, par vê part ancje jo cun lôr.

Peraule di Diu.

CJANT AL VANZELI cf. Zn 6,63.68

R. Aleluia, aleluia.

Lis tôs peraulis, Signôr, a son spirt e vite.

Dome tu tu âs peraulis di vite eterne.

R. Aleluia.

VANZELI Mc 1,29-39

Al vuarì une vore di malâts di tantis malatiis.

Dal vanzeli seont Marc

In chê volte, Gjesù, jessût de sinagoghe, al rivà in cjase di Simon e di Andree, insieme cun Jacum e Zuan. La madone di Simon e jere tal jet cu la fiere, e i fevelarin subit di jê. Lui si svicinà, le cjapà pe man e le fasè jevâ sù. La fiere le lassà e jê si metè a servîju.

Sore sere, dopo lât a mont il soreli, i menavin denant ogni sorte di malâts e di indemoneâts. Dute la citât si jere dade dongje denant de puarte. Lui al vuarì une vore di malâts di tantis malatiis e al parà fûr une vore di demonis, ma nol lassave che i demonis a fevelassin, parcè che lu cognossevin benon. Tal indoman, une vore a buinore, al jevà, al jessè e si ritirà tun puest fûr di man, là che si fermà a preâ. Alore Simon cui siei compagns si metè a cirîlu e, dopo di vèlu cjatât, i disin: «A son ducj che ti cirin!». Ur dîs: «Anìn di un'altre bande, tai borcs dulintor, par predicjâ ancje li. Par chest, di fat, o soi jessût». E al le predicjant tes lôr sinagoghis par dute la Galilee e parant fûr i demonis.

Peraule dal Signôr.

Su lis ufiertis

Signôr nestri Diu,

che tu âs creât il pan e il vin

soredut par sostentâ la nestre debolece,

fâs, par plasê,

ch'a diventin par nô ancje il sacrament de eternitât.

Par Crist nestri Signôr.

Antifone a la comunion cf. Sal 106,8-9

Che i disin graciis al Signôr pal so boncûr,

pes robonis che ur à fat ai umign;

parcè che l'anime plene di sêt al à saciade

e l'anime plene di fan al à colmade di robe.

O ben: Mt 5,4.6

Furtunâts chei ch'a vain, parcè che a saran consolâts.

Furtunâts chei ch'a àn fan e sêt de justizie, parcè che a saran saciâts.

Daspò de comunion

Diu, tu âs volût ch'o partecipassin
di un unic pan e di un unic cjaliç;
danus, par plasê, di diventâ une robe sole in Crist,
par vivi in serenitât e zovâi a la salvece dal mont.
Par Crist nestri Signôr.